

BULLA SIXTI V.

De non Coronandis Regibus Hæreticis.

SIXTVS EPISCOPVS,
Servus Servorum Dei.

Ad perpetuam rei memoriam.

Dilectoralis Nostra Sollicitudo, quam pro tuenda ubiquè Gentium & locorum, propagandaque Catholica Religione suscipere tenemur, Paternaque charitas, quam erga inclitum Poloniæ Regnum, in visceribus Christi præcipuè gerimus, & singularis zelus Orthodoxæ fidei, sinceraque erga Romanos Pontifices, Sanctamque hanc Sedem devotio; quàm ipsum Regnum, præsertim verò illius Prælati hoc maximè tempore perseferunt. jure optimo Nos inducunt, ut ijs, quæ pro conservatione ejusdem Catholicæ fidei, & pro publica ejusdem Regni quiete, & tranquillitate, piè ac prudenter à Prælatis præfatis statuta fuerunt, Apostolicæ confirmationis robur ejusdem Præsulibus supplicantibus benignè impertiamur. Nuper siquidem sicut expositum Nobis fuit in Synodo Provinciali Petricoviensi, de more celebrata, Venerabiles Fratres Nostri Archiepiscopi & Episcopi Metropolitanarum & Cathedralium dicti Regni Ecclesiarum, simul congregati, & convenientes in unum, ut more vigilum Pastorum, Gregem Dominicum suæ curæ creditum, ab imminentibus luporum periculis incolumem, quantum in eis est, præservarent: simulque unioni & paci ipsorum Prælatorum ac Procerum & Populorum ejusdem Regni consulerent, inter alia sub Nostro & Sedis Apostolicæ beneplacito statuerunt, ordinârunt, & decreverunt.

Quod tam in præsens, quàm in futurum, nemo unquam agnoscat, nec recipiatur in Regem Poloniæ, nisi fuerit verè Catholicus: Quiq; Sanctam Catholicam & Orthodoxam fidem, quam Sancta Romana & Apostolica Ecclesia tenet, docet, & prædicat palàm, & publicè profiteatur, & sequatur, & in unitate ejusdem S. Romanæ Ecclesiæ permaneat. Quodq; pro tempore existens Archiepiscopus Gnesnensis, cui jus renuntiandi seu publicandi Regem ex Privilegio competere dignoscitur, neminem renuntiet, aut publicet, qui fuerit dubiæ fidei, & non sit manifestè Catholicus. Ad tollendum verò dissidij & intestini belli periculum,

culum, nullus Episcoporum, & Prelatorum, contra jus Archiepiscopi prædicti post renuntiationem ab eo factam, scilicet de Persona Catholica, & servatis Regni Statutis & consuetudinibus, in Electione Regis audeat nominare, renuntiare, aut coronare alium in Regem, alioquin à regimine & administratione Cathedralis, seu Metropolitana Ecclesiæ, cui præest, in perpetuum eo ipso suspensus, atq; omnibus Beneficiis Ecclesiasticis, quæ quomodolibet obtinet, privatus existat; & nihilominus hujusmodi nominatio, renuntiatio, aut coronatio, invalida, & nulla censeatur, ac nullius sit roboris vel momenti.

Ne quis nominatus à Rege Poloniæ pro tempore existente in Episcopum vel Archiepiscopum ad Ecclesiam aliquam Cathedralē vel Metropolitanam, ex ijs, ad quas pro tempore vacantia Ius nominandi, ipsi Regi ex Privilegio Apostolico competit, assumat sibi honorem, nec locum, nevē in regimine & administratione Ecclesiæ hujusmodi, illiusq; Bonorum, quoquomodo se immisceat: nisi prius à Sede Apostolica eidem Ecclesiæ de Persona sua sic nominata provideri, seu in Episcopum vel Archiepiscopum, Præsulem, & Pastorem, præfici obtinuerint, literis Apostolicis desuper expeditis; si secus fecerit ad illam & ad aliam quamcunq; inhabilis omninò censeatur. Quicumque sive ex Senatoribus, sive ex Nobilibus, in promovendo Rege Hæretico, opem, Consilium, auxilium, vel favorem præstiterit, vel consenserit, aut ei jam promotō adhæserit, præter alias Censuras Ecclesiasticas & pœnas, in quas eos incurrere SS. Canonibus & Constitutionibus Apostolicis constitutum est, tam ipse, quàm posteri ejus, & descendentes ad omnes honores, dignitates, & Beneficia Ecclesiastica obtinenda, perpetuò inhabiles & incapaces sint, & esse censeantur. Nullus Episcoporum, seu Inferior Prælatus audeat hæreticum hominem ad honores, dignitates, officia, vel Beneficia Spiritualia vel temporalia promovere, vel promoveri facere, aut Intercessione, opibus, aut alia quacunque ratione, ad ea assequende juvare. Quodsi id attentare præsumperit, pœnam privationis omnium & quorumcunque Beneficiorum Ecclesiasticorum, vel Officiorum, quæ obtinet, nec non suspensionis, ut præfertur, à Regimine & administratione suæ Ecclesiæ ipso facto incurrat, & ad alia obtinenda incapax prorsus existat. Quicumque ex ijs, qui pro Catholicis se gerunt, tepidis nimirum & falsis fratribus, Apostolicæ Sedis Authoritatem, Jurisdictionem Ecclesiasticam, & Iura Decimarum publicè, vel privatim, directè, vel indirectè in Conventibus, aut alijs in locis impugnaverit, tam ipse, quàm ejus posteri, ab Ordinibus, & honoribus, dignitatibus & beneficijs Ecclesiasticis, in perpetuum arceantur, & ad illa semper inhabiles existant. Quoties ex necessaria communi & publica

Causa,

Causa, ac de licentia seu permissione S. Sedis Apostolicæ conferendum est consensu publico ex Bonis Ecclesiæ subsidium, seu donativum aliquod Regi, vel Reipublicæ, illud per Deputatos suos Episcopi exigant; nè subditi & Bona Ecclesiarum à secularibus exactoribus expilentur & prophanentur, ac varijs injurijs & damnis, prout plerumque factum est, afficiantur. Si Episcopi aliter fecerint, pænis in Concilio Generali Lateran: novissimè celebrato, & in Bulla Cœnæ Domini legi solita, alijsque Sanctionibus Apostolicis contra eos, qui etiam sponte offerunt, inflictis, eo ipso subjaceant. Demùm quòd propter omnes subitas dicti Regni necessitates, & improvisos eventus, Thesaurus, sive ærarium publicum, & commune omnium Regni prædicti Ecclesiarum, in aliqua Ecclesiæ Arce, seu Castro, providè & accuratè instituatur, & cum omni diligentia & custodia asservetur. Quæ omnia Statuta & Decreta, quo firmitus & accuratius perpetuis futuris temporibus observentur, idem Prælati, per Dilectum Filium Vincentium de Seve Præpositum Lascen: & Internuncium, ab ipsa Synodo Provinciali, ad Nos missum, nobis humiliter supplicari fecerunt, ut illis Apostolicæ comprobationis robur adijcere, aliasque in præmissis opportunè providere de benignitate Apostolica dignaremur. Nos igitur eorundem Prælatorum, ac ipsius Synodi pietatem, Sanctumque & laudabile propositum plurimùm in Domino commendantes, eorumque supplicationibus hac in parte annuentes Statuta, Ordinationes, & decreta prædicta, prout superius descripta fuerunt, ex certa nostra scientia deque Apostolicæ potestatis plenitudine, tenore præsentium perpetuò confirmamus, & approbamus, eaq; præsentis scripti patrocinio communimus, & illis perpetuæ & inviolabilis firmitatis robur adijcimus, ac per eos, quos illa concernunt, & concernent in futurum, perpetuò, firmiter, & inviolatè, observari præcipimus, & mandamus, omnesque & singulos juris & facti, ac solennitatum & substantialium, si qui in eis intervenerunt defectus, supplemus. Decernentes irritum, & inanè, si secus super his, à quoquam quâvis autoritate scienter vel ignoranter contigerit attentari. Non obstantibus prædictarum Ecclesiarum, & quibuscvis alijs contrarijs Statutis & consuetudinibus, etiam Iuramento, confirmatione Apostolica, vel quâvis firmitate aliâ roboratis, & immemorabili tempore pacificè observatis, necnon Privilegijs, Indultis, & literis Apostolicis quomodolibet concessis, approbatis, & innovatis. Quibus omnibus & singulis, etiam si de illis, eorumque totis tenoribus, specialis, specifica, expressa, & individua mentio habenda foret, tenores hujusmodi præsentibus pro expressis habentes, ad effectum præsentium duntaxat

Specialiter & expressè derogamus, illaque omnia & singula quatenus præsentibus literis in aliquo adversentur, penitus tollimus, & abrogamus, ac nolumus deinceps cuiquam suffragari, cæterisque contrarijs quibuscunque. Aut si eisdem Prælati, vel eorum alicui, seu alijs personis, communiter vel divisim, ab Apostolica sit Sede Indultum, quod interdicti, suspendi, vel excommunicari non possint, per literas Apostolicas non facientes plenam & expressam, ac de verbo ad verbum de Indulto huiusmodi mentionem. Volumus autem quòd præsentium literarum transumptis etiam impressis, Notarij Publici manu subscriptis, & Sigillo personæ in dignitate Ecclesiastica constitutæ obsignatis, eadem ubique fides adhibeatur, quæ ipsis Originalibus adhiberetur, exhibitis vel ostensis. Nulli ergo hominum liceat hanc paginam Nostræ confirmationis, approbationis, communitiois, adjectionis, præcepti, mandati, suppletionis Decreti, derogationis, sublationis, & voluntatis infringere, vel ei ausu temerario contraire. Si quis autem hoc attentare præsumpserit, indignationem Omnipotentis DEI, ac Beatorum Petri & Pauli Apostolorum ejus, se noverit incursum. Datum Romæ apud S. Petrum, Anno Incarnationis Dominicæ Millesimo, Quingentesimo, Octuagesimo, Nono. Quinto Idus Februar: Pontificatus Nostri Anno Quinto. E Cardinalis Pnat: Locus (†) Sigilli plumbi in filo variegato sericeo penden: Andreas de Alexijs M. Vestrius Barbianus.

Concordat cum suo Originali



IOANNES WITKOWSKI I.V.D.
Protonotarius Apostolicus, Archidiaconus
Cureloviën. m. pp.

